

四庫全書

集部

欽定四庫全書

克齋集卷十五

宋 陳文蔚 撰

用門牌日有好花迎客笑歲筭新酒奉親懽為韻
為老人壽

地僻廣乾坤身閒多月日耕鑿太古民天然自淳質未
始泥神仙閱世自長久日用飲食餘帝力我何有脩竹
三徑幽青山四時好何須萬間厦一廛可娛老園柑結
新實籬菊開晚花旋筍甕頭酒不負老年華田夫與野

老一笑相逢迎只說桑麻事安知市朝爭年年願今日
有酒可留客雖是無珍饈隨宜具餽核人言鶴髮翁翻
作朱顏少把酒更何辭一對西風笑環堵一畝宮中有
長生計秋月與春花今年又明歲年高親可慶家貧兒
包羞今年勝去年粗有酒新筇歲月綿綿永福祿日日
新天開九齡數眼見四世人共樂堂上親旋約山中友
雖是盤無饌未至樽無酒積善雖人為康寧荷天寵但
愧儒素風日乏甘旨奉子孫雖未賢粗肯詩禮親願言

各努力忠孝以立身人間無事日簞瓢亦清歡但願從
今日時時報平安

夏夜露坐偶書且勉同學子

人生邂逅如岐路南北東西忽離聚淵明本賦歸去來
保社乃今隨所寓讀書不雜囂塵聲好在園林最幽處
朱橋跨出林陰外一水遶庭將綠護有時小立凭危欄
臨風不忍空歸去矧逢暑夕遠燈火杖策月林時散步
更深每與二三子輟寐每為清景駐山高望望北斗低

花香拂拂南薰度擬將曾次滌河漢不管衣巾濕風露
清談未必真廢事言下應當有微悟不妨俯仰更觀察
此意直須起訓詁郊墟次第新涼入自可燈窓窮入暮
凡人努力在年少老大悲傷欲何訴嗟予學古雖有志
蹭蹬獨為一生誤為魚性分信機淺風月情懷乃天賦
歸哉要結園綺徒清夜團欒遶庭樹

予始生日巖叟攜酒見過且有壽語賦此以謝之
自笑山澤為癯儒儕之富貴非其徒他人誕日讌歌酒

貧家簞瓢屢空虛
昨朝不記生年月
面前忽見樽罍列
感君祝我還祝君
兩翁相對頭如雪

乙亥老人生旦

兒願歲歲登斯堂
再拜為親扶壽觴
近思去歲生日時
膝下羅列兒孫行
更願明年似今日
酒面菊花如意黃
人間富貴誰不願
兒只願壽長且康
田園薄有可衣食
但要作善思無疆
生涯淡淡隨分過
不逐勢利常奔忙
初非熊經慕仙術
自是日月閒中長
天賦清奇古容貌

精神矍鑠筋骨彊今朝捧酒祝親意不知何者堪比方
欲將吾親比松栢松栢老不禁風霜欲將吾親比龜鶴
龜齡鶴算終可量溪北柱石山峩峩蟠根結據繇洪荒
家居山下不記年永與山石同蒼蒼

責已

聖人當耳順吾年已逾再日覲有新功邇來如稍怠嗟
爾性雖鴛敢不鞭其退須教十二時此心無不在書此
當盤銘終身以服佩

丁丑老人生旦

箕疇五福孰居一惟有年高無等匹皆緣作善天降康
視履知當獲元吉貧居衣食雖屢乏牆下有桑園芋栗
垂肥衣輕豈不快徃徃久長難可必矍鑠吾翁八十五
骨勁雙瞳如點漆安貧每甘菽水養雖是形癯心則逸
菊花開晚似有意不為重陽為今日成行兒女羅酒漿
拜祝願天從所乞不願分外樂事多只願親安體無疾
不願官書汾陽考只願親年增秩秩兒孫倘或有生意

此去買田多種秫直須釀酒如春紅歲歲稱觴無了畢
况當風物一年好盤薦黃橙并綠橘

戊寅老人生旦

吾家本是田家子其先世世居田里兒因逐食浪飄蓬
欲歸無以供甘旨吾翁亦能甘淡薄日夕飯蔬而飲水
渾然質朴古人風固應自有長生理筋骸雖老自康健
聰明少壯猶難比了無機械足怡神不生嗜好彊精髓
人間可慕是榮華人間可羨為奢侈榮華有似庭下花

芳菲之日知能幾豪侈真如草頭露不能頃刻朝陽裏
誰知貧賤自安分年年如此只如此吾鄉自來丙山高
位當南極崔嵬起吾家門門對此山筭高欲與山同紀
加之西鄰與東舍往往黃髮皆兒齒酒熟長願相招呼
一笑忘形相汝爾

自鉛山歸上饒途中感興

來時積雪歸途熟暗中流換驚時節所幸康寧九十親
依然堂上垂華髮隨意何當足甘旨斑衣日戲慈顏悅

丈夫事業有用舍窮通不必生分別直須用力隨處處
無徒瀟灑送日月嗟嗟世人泣岐路東鄉久哉吾計決
終當縲馬扶桑樹車行萬里誰能遏慷慨自奮歌此章
老去不知情激烈

送周希顏游章貢

憶昔吾先師慷慨歌遠游超忽凌八荒咫尺視九州東
將征暘谷挂衣扶桑頭而不畏羊腸而以摧其輶南轅
有遐眺直指百粵陬北駕何所之亦欲窮燕幽墮地弥

矢志壯歲無不酬肯學鄙丈夫拘剪守一丘今日因送
子歌此臨清流江深不可極負重萬斛舟慨然動高興
不作賈胡留發足真自此行矣萬里脩儻或跨疲蹇路
長殊可憂願言自努力歲晚當遂謀江山有會意寄書
傳置郵

己卯老人生旦

今朝酒熟吾翁喜又見生朝會隣里雖無盤饌羅羶葷
情話從容自嘉旨人生富貴固足樂惟有長年難得似

恬於世味心自閒贏得龐眉更兒齒晨興再拜啟阿爹
從古昭昭是天理不因為善天降祐何以康寧膺壽祉
稱觴膝下列兒孫雖說居貧良亦美從今都不記春冬
只消歲月將時紀束書但願早還家年年祝頌秋風裏
窮冬積雪閑織紡婦

長哦幽人詩九月欲授衣方當流火辰先已戒其期當
春非不蠶入夏非不絲一寸不上身止為憂啼饑蠶畢
起功績關心聽鳴鴉豈不念人生所急在衣食衣單寒

不禦鶉結百千縷輕裘那得知淒其良自苦窮冬歲將
往雪片大如掌憐他昨日織安知今日紡嬌癡貴家女
未始識機杼紈綺厭不華繒帛何曾數貧富固有分茫
茫何足論感觸此時心寧不哀窮困馮誰歌七月俾汝
知時節塞瑾聊補紉團圞園楮

建德道中六言

有底可人情意盡是酒村魚市行人忘却家鄉沽酒買
魚供醉

徐敬甫出示所居之別墅南巖圖并諸公題詠欲

予同作為賦長韻

庚辰正月十二日

憶昔同作康山游杖屨歷徧千巖幽知君已具看山眼
每遇勝處嘗淹留從茲一去間何濶倒指殆欲忘春秋
不知此地復何地但見大江東去流相逢恍然如隔世
盡洗積年離別愁首為袖出南巖圖着鞭先我占一丘
南巖之高不可攀俗駕欲到何緣繇君乃結屋於其巔
避世擬追園綺傳雪飛霜瀑自天落戟列萬竹千雲修

客來煮茗話疇昔酒熟春禽相勸酬自言得此已足老
豈復更懷身世憂無心偶作雲出岫良念棣萼情綢繆
對床聽雨有真意肯放拂衣歸去休登高一日展遐眺
洗眼九華雲漬收語我南巖卜築地只放五老高一頭
丹梯萬丈徑可躡獨恨未遂曾往謀我生亦有山水癖
欲見未見心先投長哦南山白石爛夢寐滄江飛白鷗
歸與亟辨買山計甘與世好相盾矛采蕨可以忘朝饑
種橘自當千戶侯眷言志事在畎畝適我願兮遑他求

此時作書報同志知肯遠為題詩不

石潭道中追賦大江

此後回
途所作

我生大江東與江不相識一日作遠遊江頭因目極桃花春未漲水落略見石望斷淮山青隔岸纔咫尺恃此一葦航焉能恨南極雲屯十萬衆守衛以人力撫御有良將成城衆心得江淮唇齒勢如家護牆辟守淮即守江淮民須愛惜我朝聖澤深不在險在德慈儉今天子邇遐無間隔大臣百執事根本共培植

追賦九華

我聞九華名未登九華峯晚視百里外烟翳嘗冥濛快
意一披挾幾欲挾長風庶識真面目高下俱迎逢飛雪
如有意未積先消融凌晨展清眺萬里開晴空炯然明
吾眸洗出青芙蓉未暇窺杳眇固已領其宗憶昔訪廬
阜妙處嘗支筇景遇可題品一一歸詩筒九華名此邦
挺挺諸山雄若欲於五老優劣定其中竊比之孔門等
級回與雍未敢謂覈論折衷章泉翁

臨行章泉令論
五老九華優劣

追賦秋浦

我為秋浦遊欲訪秋浦跡及已到此邦秋浦無處覓或
云百里間始見江祖石或云江祖石止在齊山側地形
著山川記載具文籍父兄世流傳論且不可覈况出形
器表理可俄而測所以聖人心貴在於默識不然差毫
釐千里成舛忒想今錦鷄鳥欲見已不得試聽白猿吟
儻能喧夜寂

入郭回度黃沙嶺息木陰下口占古意

孰驅我去孰驅我歸息蔭喬木清風吹衣火日炎空聊
此徘徊夷險自若怨尤誰哉世間萬事付酒一杯

辛巳老人生旦

陶陶太古民風淳詐偽不萌情意真何嘗吐納事屈伸
往往皆為百歲人中古便似秋冬辰和氣無復如陽春
機巧百出妄喜嗔七十者稀以為珍我翁逍遙常幅巾
朴素幾與太古隣飲食淡泊厭羶葷衣裘不擇敝與新
日日娛嬉寂寞濱甘與聖世為遺民天錫遐齡登九旬

回視同庚皆土塵炯然雙眸且精神堅彊直可齊松椿
兒孫雖不側朝紳家庭禮法粗克遵白酒年年造逡巡
膝下戲綵娛慈親

周道人求詩書贈

道人妙推筭未知誰賞音章泉謹許可贈之五字吟老
我已無用窮通總無心但思結茆地訪君白雲深

荷湖行為趙忠州壽

青山屋上名荷湖故知下有神仙居全似太華峰頭玉

井樣花開十丈世所無自有天地此山有誰人種得如
船藕造物不肯輕畀付付與湛溪雲隱手雲隱濟人陰
德多有如此藕痊沉痾自煉還丹成九轉方瞳點漆顏
長酖甚不愛飛霞千樹結蟠桃甚不愛湛溪千頃漲葡
萄蟠桃入口那能甘比蜜湛溪不抵酒滴真珠槽愛蓮
往往緣青壁俯笑凡人無路覓不知身世若為高但見
照人雙眼碧寄語峰頭十丈花年年來伴棗如瓜不須
更記歲與月只記山前雲隱家

忠州別墅種桃名飛
霞湛溪即其所居

癸未老人生旦

昔人端為祈黃耆再拜慇懃扶大斗吾翁今年九十一
兒從兩歲貧無酒趨庭何以祝彌誕盈把菊花空在手
嗅香嚼藥當甘旨翁亦怡然如適口人生貧富在分定
獨是期頤世稀有翁餘九十兒七十膝下龐眉仍皓首
若將此事較人間豈非造物意愈厚因茲歷歷詔兒孫
自古悅親惟孝友上悖下睦無間言一門和氣薰蒸久
雖無旨酒奉杯酌意樂心寬親自壽更於大節保終始

立身揚名以垂後世上榮親無若此何必金章并紫綬
南隣白酒況可賒豐儉隨家惟用缶年年此舉諒不難
甲子無窮環癸丑

寄題俞伯南所居

毋為陵學山當為川學海尹重貴自任願樂誓不改
右希賢

巖築無外求莘耕有餘樂既為堯舜民自抱羲農朴
右野處

器重或可勝道遠疇能至勉效既竭回羞稱願息賜

右毅齋

石溪道中偶作

自從天地開闢來溪水清駛山崔嵬山高水清亦奇觀
怪問胡不生人材人材本作世間用朴朴支傾作梁棟
不然空冒一時名過眼空花已如夢人生出處不可期
伊周亦偶遭明時顏閔何嘗有科目德尊百代帝王師
自古相傳惟此道一派源流端可考道存不係窮與通

經濟業窮耕釣老風埃鼎鼎百年中世事興廢何終窮
只有詩書傳聖學堯舜授受同高風喚醒此原山與水
孕秀發祥從此始立朝有道佐明君抱璞山林亦奇偉
吾家家此不計年未知起者誰其先丈夫才業貴自負
不必美惡歸山川久欲題詩磨翠鉞要使後來聞義激
乾坤造化豈無人細與摩挲觀此石

此詩將以
鐫諸石溪

諸君用東坡玉堂觀郭熙畫詩韻題江山王君平
遠樓黃子京攜至求同作

有客有客心地閒樓外青林林外山風烟出沒美無度
依約圖畫有無間眼隨白鳥去邊遠一聲漁唱江村晚
此時誰會倚欄心雲出不知何處嘯歲寒松栢飽風霜
肯逐桃李爭春陽安得共卧百尺樓為挹江瀨吞山光
當年影過八埒日坡仙想像頻搔髮無言細玩郭熙畫
應思老去尋泉石

坡詞我方老去尋泉石

寄題玉山周晦叔家似賢齋

人心殊嗜好黑白互相形逐臭不自悟熒熒飛青蠅一

日對此君炯然雙眼明子猷雖借宅綠陰仍滿庭雅淨
兩龔潔高寒伯夷清可近不可狎勁挺千青冥世人景
先哲繪畫勞丹青想像不覲面孔孟何絲傾安知君子
交日日與相迎手種萬蒼玉君家有典刑清風流至今
修好無渝盟

晦叔名自輝似
賢其先人所名

題周幾道桂軒

桂在隣家
軒對之

軒前一樹桂手種知為誰但見青如蓋團圓障朝曦西
風入庭戶吹香浮酒卮相與一浩歌渙焉剖藩籬

玉山朱文龍有遺經林野二處趙昌甫程德夫皆有詩朱求予同作

漢人一經訓籙金云不如君家遺經意不與漢人俱
右遺經

有人抱幽真偏適林野趣要之等喧寂乃是安心處
右林野

薛玠兩投詩以古風謝之

知君家住象山麓日有見聞新耳目自憐各在天一涯

休譽惟能採鄉曲却來一見玉溪頭已知標致非凡俗
等閑揮翰墨淋浪惠我新詩不金玉細將學問說根源
異同更與明朱陸吾道工夫有端緒要是義精仁乃熟
博文約禮是真傳收拾奇功歸謹獨參前倚衡勿間斷
千載斷絃端可續手披詩卷荷情真聊以斯言報諄復
永邑楊君鑑子明闕齋讀書將從事於古人為已
之學求齋名於予并欲得一語以示為學之方
予謂學雖多端而其要莫先於明善所以子思

孟子俱以此開道後學大學格物之訓寔同出一源故因楊君之請扁以明善且詩以演其義
幸毋忽其言之陋云

人性靡不善因物始有遷本體遭剝蝕如鑑塵所昏疇昔均秉彝善端本綿綿既茂閑邪功誠心所繇存若為用力地格物居其先萬殊一理貫洞然見本根表裏俱澄澈斷斷義理分言動中倫慮狂愚詎同論彼哉迷復子一息萬里奔認贅以為嫡未嘗知反觀君子審取舍

不容涇渭渾中局瞭如燭肯蔽耳目官中庸示明訓一
言會其元

汪元思遺詩和意以謝

吾道本公平何嘗分彼此總只在人心渾然皆天理推
原賦予初所鍾均粹美賢愚同一轍所行無意軌繇其
氣稟異於焉有臧否清者洞然明泓澄如止水濁者性
天蒙蕩然惟縱弛末雖有善惡反之即其始變化在乎
人雖愚必明矣日用無餘功自修惟克己近代朱文公

此道賴綱紀居嘗語學者虛名以為恥必先繇博學然後能約禮顏淵躬四勿曾參悟一唯吁嗟今世人非不究經旨議論徒紛紜反躬垂踐履好惡徇私情是非隨愠喜體既雜真妄用斯殊表裏要在無間斷善端勤積累須臾不可忘顛沛必如是堅持敬一字方知道在過我輩無他求直須安汝止

克齋集卷十五

欽定四庫全書

集部

克齋集卷十六

七

詳校官庶吉士臣翁樹培

主事臣呂雲棟覆勘

覆校官中書臣宋鎔

校對官監丞臣張曾炳

謄錄監生臣李錦

欽定四庫全書

克齋集卷十六

宋 陳文蔚 撰

辛酉春遊金華出東郊

青山雙夾小溪流
綠篠人家古渡頭
雖是溪山不相識
勸人啼鳥却相留

常山道中

路勢弓腰轉湖光鑑面開
稻田春事給村碓晚春催
問宿尚十里與誰同
一杯自憐今日首頻作望鄉回

甲辰九月初訪晦菴先生大安道中和余正叔韻
瀟瀟風露菊花秋人在甌閩第一州少日已嘗懷壯志
今朝端不負清遊陪君數日從容語洗我平生散亂愁
從此歸來復何事風濤雖險奈虛舟

歸鉛山正叔復用前韻和答之

歛藏先用肅如秋次第陽和徧九州歲月正緣閑裏度
紛囂那得靜中遊明知與點有真樂未足希顏却自愁
諷詠棹歌思九曲與君重約泛扁舟

和正叔詠梅一絕

兒童剪伐未須施
竹外橫斜一兩枝
冷艷更開深雪裏
此花應不與人知

和李監稅

一縷彤霞晚照晴
眼隨白鳥去邊明
踈踈烟樹有無際
激激灘流高下聲
歸思楚雲連日暮
新詩邊月帶霜清
前村儻有梅花約
草草相逢蓋亦傾

和徐子融見寄

學問分明有本根一編魯論幸今存奈何至理難窮究
願與良朋細討論欲探聖傳千古秘莫令心鑑一毫昏
吾儕總在生成內要識無私造化恩

記夢

夢裏分明記本根覺來無語正心君陰陽却把量消長
且喜新來勝一分

示浩

持身端的在兢兢謹獨方無愧怍情莫道隱微人不見

暗中臨我有神明

雨中即事

客身常恨春多雨
遙想吾廬長綠苔
每作家書問無恙
故園梅竹為新栽

送趙國開赴崇安丞

十載交遊一日如
高情多謝不相疎
分攜幸不隔江海
得便常須訪起居
折柳正當三月暮
汎舟深約九秋餘
相期暇日吟哦外
只有公勤是薦書

和徐子融韻

遜敏工夫不可偏兩端相濟若韋弦允懷固是常存養
明善誰知合在先

其二

讀書端的在研窮洞貫精粗與始終卓爾顏淵有真見
分明來自博文中

其三

雨餘雲靜太虛澄月在今宵分外清喜得佳篇來諷詠

世間榮辱一毫輕

其四

自憐涉世每多艱事到縈心或厭煩
近日工夫何所似
有時慙愧夢中閑

庚戌春下鄱陽舟中諸作

浩蕩春江洗客愁歌聲欸乃發中流
溪齋却憶凭欄日
數盡來舟與去舟

予項年館寓汭口
書齋正瞰江上

右解舟汭口

船篷推起不教低為放山光水色歸客子離家已三日
楮亭山下欲斜暉

右過楮亭

櫓聲終日聽咿啞碧浪紅旌動彩霞獨我船中無一事
安排詩句過桃花

右過桃花臺

遠山淡淡水茫茫知是江湖何處鄉娘子提攜青裏布
始知風土近鄱陽

右過安仁界

書窓碧桃

銅瓶只插碧桃花日對幽人靜不譁為爾細觀冰雪艷
就中便覺牡丹夸

病中對竹

窓外修篁僅百竿相看不待報平安何時得我身彊健
共爾青青到歲寒

和子融韻

為把新詩子細尋時移不覺日西沉固知妙旨存精一

須察人心與道心

子融詩有精一危微共一心之句故答之如此曾舉似先生先生易兩字

云正為人
心與道心

又和清明日兀坐用前韻

天理流行不用尋鳶飛魚躍自升沉細觀自有昭然處
始信嚴師是此心

和子融聞琴

古曲誰彈起千年無此音尚憐惟韻在端欲後人尋指

上雖傳操聲中要識心半生孤此志絃續自而今

趙守禱雨有感枕上得句足成五十六字呈趙守

雨意隨人自及時使君一念寔通微不知沛澤人間遍

但覺炎蒸夢裏非苗稼頓回枯欲死桑林又喜綠添肥

從今飽喫鄱陽飯細紀賢侯德政歸

二句枕上得

七月廿六日登四望亭小酌和趙守韻二絕

為愛黃雲到晚晴一樽高興寄危亭風荷捲水高低綠

烟樹連山遠近青

其二

極目風煙盡一城
身閑無日不登亭
雙明遠與孤鴻沒
繞郭一江羅帶青

和趙守木犀

花開時節趁柔金
冷露繁霜未許侵
況是天香無俗韻
一樽清賞有知音

送歐陽國瑞歸鉛山

交遊無數竟誰同
雅羨夫君氣似虹
吾道久隨流俗弊

義居今見古人風
端能縱目秦淮上
邂逅論文楚水東
歸去梅花開也未
江頭葉葉剪霜風

寄題吳伯豐同榮堂

一氣同流舉切身
胡然於此限比隣
直須靜處工夫到
便覺閑中意思真
心遠獨游千載上
客來共醉一樽醇
寓形寓內皆生意
何但名園草木春

舟行望龜峯

面對靈龜竄上峯
舟中活計不為窮
半春臺下桃花水

一霎岸邊楊柳風天巧此時窮險怪淵泉終日悟流通
一生堪笑漁翁拙卧聽潇潇雨打篷

每次蘭溪和歐陽國瑞韻

客子經行處吳江萬頃秋風煙曉濃淡雲樹遠稀稠緩
去花相送重來鳥勸留與君無楚粵一笑況同舟

贈陳敬甫

鄙水相逢亦偶然吳中邂逅復掀髯細思話別秋風日
已是浮生一歲添

月臺觀月

秋來無日不登臨，獨喜今宵月滿襟。
仰面青天思把酒，寄情古調欲攜琴。
涼風舞袂身將舉，白露沾衣夜向深。
要看一臺清影滿，儘教移轉碧梧陰。

又和歐陽國瑞韻

臺高無奈月明何，豈憚攀緣上岌峨。
萬壑秋聲歸草木，百年鄉思動關河。
遙知素影千家共，不獨秋光此地多。
中夜酒酣狂欲舞，停杯且復聽吳歌。

和趙工部臨安見寄韻

節物驚人故欲催天涯倦客幾時回坐傾濁酒醒還醉
手把新詩捲又開遠想含香當奏事近緣無月不登臺
烟波見說西湖好要趁秋風把釣來

十一月十四夜誦康節詩至憶第三首潛然有感
人生雖是有愚賢到底天倫只一般惆悵同安何處所
不堪歲暮更天寒

自吳中歸過釣臺

倦游偶得賦歸來我亦何心世莫猜
水綠山青從所好
一帆風過釣魚臺

過趙清獻墓居

為讀忠臣孝子碑欲行回首重依依
紛紛車馬門前過
知有幾人琴鶴歸

見梅

曉鷄殘月更離程只見梅花不忍行
水郭山村誰是伴
惟伊與我共孤清

望靈山喜而又作

白雲深處認靈山
喜氣津津眉宇間
別去庭闈今八月
且欣明日慰親顏

程子雲欲還鄉阻雨聊戲之

霏霏小雨釀梅黃
結束琴書底用忙
已幸一春鄰絳帳
祇今十日是端陽
榴花灼眼新篁翠
盧橘盈盤煮酒香
天識主人留客意
故教歸路滑羊腸

探梅不遇登祈雨峯

人生何處不從容
旋向僧家借短筇
那為孤芳窮僻遠
要留腳力上高峯

送彭應期下鄱陽

當年心事幾綢繆
長記天西玉一鈎

應期頃年同寓鄱陽有天西玉一鈎

之客裏近來嗟我倦
江邊重得送君游
讀書會有新功
用把酒聊尋舊倡酬
自愧不能追往事
但勞清夢遶螺州

湛溪納涼

是處皆炎熱澄江消客憂相邀讀書罷同作浴沂遊
自喜坐茂樹誰能喚小舟月華如有待先在柳梢頭

夜坐有感年四十

仲尼切戒取人惡孟子真能不動心嗟我癡頑何所得
但能於此惜分陰

徐子融八月四夜見訪值予有出寄詩三絕和韻
以謝

雲開日脚漏微明無奈秋風掠面清因作西鄰閒縱步

不知乘興有高情

其二

小齋雖不奉名譚此理要須見倚參
料得歸懷明月滿
不應對影祇成三

其三

夜涼燈火掩柴扉詩誦城南憶退之
更把新詩細紬繹
魚言誰會點頭時

予酷愛桂香置兩枝於蕭寺之寓室
日出不得對

花夜歸月影在窓撒燈清坐為賦二十八字

惜香故剪碧雲枝却負花香花有辭為輟清眠陪永夜
月窓相對恰相宜

十月三夜省愆二絕

親為父子須還愛分屬君臣合用欽細算天心無負我
我生猶有負天心

其二

孔子九思頻點檢曾參三省重綢繆事來若也能思省

事過何因有悔尤

和徐子融見寄

清時何故有遺材
酒膽如虹亦壯哉
多謝論交比金石
自慚進德未涓埃
政須尊酒風前共
莫作扁舟月下回
風雪當門須有夜
要觀四物一時來

子融夜相訪必以杖笠燈劍自隨燈

名訪賢劍名斬姦風
雪當門見康節詩

用趙國興梅韻自賦

西郊有客枕溪居
特為孤芳小結廬
窓外橫枝踈帶竹

花邊流水暗通渠伊方傲矣百花上我亦翛然三徑餘
此外不關茅屋事為誰煙雨自粧梳

國興招飲後圃即席賦

甲寅
以後

主人命酒嫌杯淺狂客催詩恨句遲此夜直須詩酒領
十分春色在花枝

上巳遊惠泉和趙國興韻

閒倚欄杆覓句時此身如在浣花溪草迷芳徑王孫醉
花滿春山杜宇啼酒罷啜茶留石井興餘隨月步江堤

清泉白石平生約未有工夫為品題

徐子融以詩送余方叔吳介甫二書見示和韻以謝

借得緘書卷又開喜同千里故人來切磋正為求真益
肯使鱗鴻泛往回

其二

簪去良朋未有期無邪端欲正吾思近來自服無他藥
一卷中庸對證醫

送趙德勤將漕淮東

逼人富貴固駸駸
體國憂時一寸心
符印遞遷無曠歲
廟堂誰謂少知音
民間利病搜求久
財計源流講究深
飛輓恢恢有餘地
要知罷困極于今

其二

才難嘆息古猶今
使節雙持委寄深
真主厲精思吏治
累朝忠孝結人心
激揚正賴扶風憲
欽恤惟存布德音
吏稱民安兩無事
不妨丹扆獻規箴

其三

登亭每憶楚東時
把酒吟詩對落暉
拭目正看黃鵠舉
回頭不奈白雲飛
未應失計荒茅屋
正坐無錢買釣磯
畎畝有懷常抱膝
論思惟日望公歸

送彭應期遊淮東

昔日淮西今又東
為文怪似史遷公
遠遊要是丈夫志
自足一枝真計窮

其二

論心有約未能遂兩載江頭再語離縱乏青銅沽一醉
臨風分袂可無詩

六月十四夜獨坐無喧閣

凭欄無事此時情一闋欣聞欸乃聲歸去夜闌誰管領
付他風月自清明

七月四夜雨過差涼閒坐和徐子融晦日所寄四

絕

昏花病眼已經年世味甘酸總澹然堆案文書渾不讀

一燈危坐晚涼天

其二

珍重羲黃書一編昔經秦火不能然君今於此得消息
豈外吾身更覓天

其三

每向清宵自省愆滔滔無奈世皆然盈虧消息因而悟
萬事支頤一聽天

其四

此理分明見各偏何時講習到同然寄書好與隨菴道
千里元來共一天

隨菴謂
余方叔

送趙國晉隨侍之江西

如今無復酒腸寬十五年同一夢間

國晉常舉十
五年前話歲月

易從愁裏換鬢毛多向別時斑諸公臺閣總皆着獨我
山林自愛閒見說西風欲回首樽前重得話間關

七月廿六日趙國興招飲山堂有詩和韻

滿地秋陰日欲殘故人相約過松闕風煙雨後呈姿態

杖屨秋來起廢閒，喜有詩情濃似酒。
從渠日歷積如山，清溪況解知人意。
為遶山堂綠一灣。

和韻呈徐子融聊寓規諫時子融同會

儒黨凋零類月殘，興言及此寤情關。
杯觴固可隨宜醉，主宰何嘗有暫閒。
行健要將乾作馬，登高須識艮為山。
莫教盡日勞舟楫，只在當初相見灣。

近衛城有溪名相見灣

和趙連州雨中宿蒙軒韻

千巖萬壑暮雲歸，不但晴宜雨亦宜。
妙處已將詩句寫

吟餘惟有夢魂知對床誰共三更聽擊節難名一段奇
安得山間伴清宿擁衾推枕和公詩

和傅國開縣丞竹澗韻

隨宜適意小軒亭傍竹臨流取次成地接園池山逕近
竹澗去所居
欣欣園近畦分花木四時平秋風日有酒杯樂徑石
時敲拄杖聲既有清灣堪釣月可無一葉小舟橫

又和載酒過竹澗韻

名園一水綠潏洄消得風流太守來把酒哦詩真不惡

此時懷抱十分開

連州再招飲蒙軒次其韻

把酒蒙軒喜屢同笑談終日坐生風但知此意無欣厭

一任時人自介通醉裏直愁逢李白

連州遇酒必賦詩

席間何

幸有車公南枝趣取梅花未賢聖時時為一中

連州臘月之官

時坐間亦有狂客

十一月望後同徐子融黃子功送先生歸閩是夕

宿分水嶺頭遇雪次早別先生二兄北歸約聯

詩不成自賦一絕

先生風節本高寒，千仞峯頭雪正漫。
一夕諸生聆妙論，時人莫作剡溪看。

後一日和徐子融韻

未省千林變作瑤，祇知尊酒侍清宵。
大將臣子明忠孝，妙在陰陽驗息消。
憶此老仙衝雪去，歸歟兩袂喜風飄。
嶺頭故事詩能紀，先生云此嶺頭故事也今古相逢總不饒。

乙卯正月別子融

相逢便欲作歸謀為子慇懃一日留山好不妨和雨看
水平重得遶湖遊酒須更放微醺飲詩亦無勞着意求
別去不愁山水隔興來徑理雪中舟

三月望訪徐子顏

近有平林遠有山先生無日不開顏杜門有味心千古
何用浮名落世間

九月十一日挈浩同省先隴早起四山昏翳衝霧
露涉水登山至山顛則日已東上澄空朗然下

視村中霧猶蒙罩人烟桑柘皆不可辨戲成一絕

挂上高峯近日輪四山端的見來親此身已在煙霾上
可惜煙霾底下人

子融觀木犀懷趙連州有別後吟情渾冷落不知
花卉若為開之句錄以見寄予報云近讀書之
暇多哦康節詩時有自適處忽奉佳章輒用此
意繼韻後錄呈先生有報書

詩哦擊壤興悠哉一任光陰頭上催
味好花間飲醇酎
風清竹外見踈梅孤鴻忽自雲間至
好意驚從天外來
人有合離花一也不應人去不花開

晚步傅氏小園

溪園信步晚徘徊
白白紅紅夾徑開
漫折一枝攜在手
也教人道看花來

趙湖州東園雜詠和人韻

芳園十畝面東開
春色知從此地來
門外風光渾未覺

堂前早已發桃梅

右先春臺

遠樂數聲聞玉簫酒酣起舞月中宵
謫仙當日真豪放
明鏡飛空許見邀

右邀月

着眼高時四海空何須服日臉霞紅
清朝坐對升陽谷
萬里雲煙在古風

右賓日

吞夢曾襟納九江等閒領客醉壺觴愛將萬事尋源委
鋤到雲間得祕藏

右一勺

亭據高峯上上頭登臨人世一漚浮
鷺塵到此都遺盡
直欲垂風跨鶴遊

右雋遊

剔攘取予見經綸中的工夫又日新一醉使君豪氣發
頗思三箭定邊人

右嬰圃

和傅巖叟病中見寄

平時安樂病中知
多少人間未發機
若把此身常似病
分明四十九年非

雨不止和族叔韻

小齋容膝足遲回
世路羊腸不用猜
久矣此心冥進取
翩然何日賦歸來
新筍半熟甕頭酒
小摘微黃葉底梅
盡日北窓聽雨卧
任他門巷長蒿萊

戊午正月送趙工部赴江東參謀

設門大字題嘉遯買宅浩然歸去來十畝清溪千箇竹
一庭春意半窓梅漁樵正伴詩翁樂鷗鷺俄驚詔墨催
底事此中留不住釣磻知有濟時才

許世卿考亭邂逅為予修琴臨別求詩為賦長句
邂逅相逢不記春未知此際得情親一溪雲月閒中計
三尺絲桐物外身未有清尊酬痛飲已驚明日是行人
抱琴歸去無餘恨大呂黃鍾一味醇

雪中約嘉言叔

沒曉園林玉萬株
最宜梅竹與茅廬
高人想見詩肩聳
乘興還能訪戴無

送傅君玉赴廷對

自嘆忠腸皎日星
致身無地老巖垌
君今有策奏天子
要使讒邪縮項聽

讀書傅氏揖桂林
外一山恍如徐子融
書閣所見
書閣見山之陰
揖桂見山之陽
戲成一絕呈子

融

自昔桂陽名此山登樓恍若見

音林現林端山中固有誅茅

地却許吾人背面看

子融和答三首再用韻賦一絕以謝

登樓觸目皆詩料難寫風煙盡筆端不但綠陰晴後好
亦便山色雨中看

傅材甫窓前白月桂開材甫索詩戲作

天然容貌本施朱喜異羞同世不趨化得丹砂成玉雪

也知人着半工夫

其二

水姿冷淡不求知，却有同心為賦詩。
更約東君同管領，一尊相對晚涼時。

中秋雨作中夜月明，余方叔留寓齋宿，酒闌隨水
縱步，方叔有詩，用韻同賦。

瓊樓玉宇不勝秋，把酒臨風味轉優。
雲雨自為朝暮變，歌詩不盡古今愁。
誰知明月天心到，却有佳賓水際留。

無限醉眠呼不醒
步隨清影只搔頭

方叔再用前韻約同賦

坐談冰雪滿懷秋
珍重余君學素優
每有詩情并酒興
為平月恨與花愁
支頤萬事從渠變
拂榻今宵為我留
何處青山堪卜築
約君歸種菊千頭

同余方叔龔南才納涼於筠谷竹間題五十六字
躡險捫蘿策短藜
翠微深處有幽棲
風常拂面炎涼變
事不關心得喪齊
白酒攜來雲外飲
新詩留向竹間題

相陪盡日餘清興
猶自徜徉玩碧溪

侍嘉言叔溪行和其韻

山下江清水見沙
杖頭沽醉酒旗家
多情黃菊知人意
故放籬邊三四花

和趙國興訪蕭氏草堂

四野山圍面面屏
何人結屋趣方成
好風吹過半湖碧
白鳥飛邊一點明
乘興半春攜酒約
隔山遙夜讀書聲
買鄰為愛茅齋近
試倩詩人狀此情

庚申清明日子融出遊寄示紀遊十絕以長句謝之

浴沂天氣出郊坰所至題詩取次成
花塢風煙俱入詠
雲巖泉石屢增名
摩挲硤石舊題字
展轉東山未盡情
不出祇尋窓下計
春光隨處亦清明

晚步清暉不見主人題竹間

飽食無餘事
逍遙散步行
清暉人不見
鷗鷺自相迎

送趙國宜赴筠州戶掾

苦無多路旅程寬正是江南綠打團欲濕征衫梅雨細
不成客夢麥秋寒官閒詩可頻搜句親近書宜月問安
自笑無才愧之子明時君祿詎能干

送趙國開赴湘陰

聽取閩山父老謠屢曾遊戲試牛刀雙鳬澤國翩翩去
一鷄秋風漸漸高書至未忘千樹橘政成須種滿城桃
早歸宣室膺前席莫漫江頭賦廣騷

國開種橘
自號橘隱

和茂嘉郎中催梅韻

快讀新詩似見梅
昏昏醉眼為君開
枝頭未見粉苞露
句裏先傳春信來
試問花神緣底晚
政須羯鼓為渠催
前枝見說南枝早
合取彭溪溪上栽

時在彭溪席上

二月廿一日遊藏勝有感

柴門終日掩荒苔
記得年時把酒杯
幸有春風到桃李
一年一度看花來

和趙國宜轉寄傅巖叟詩韻
時歲歉人艱食聞國
宜有發粟意因有以勸相之國
宜華文郎中子

郎中以兼得濟閣職

雲章華閣照明時
朝野如今尚採詩
紫府祇因通夕夢
永平從此失朝飢
似聞令子心傳印
便有行人口似碑
還許秫田分靖節
黃花重九醉東籬

和趙忠州見寄

道義雖同趣窮通
奈兩途蜀閩歌召杜
莘野樂唐虞
世上風波惡
胷中矛盾無
交情歲寒見
故我即今吾

趙河源幼子種蓮於盆池
一幹開雙葉戲作小詩

時河源二幼子一受命矣

穉子堂前戲綵時種蓮積水作盆池間聞並萼窺紅影
誰識雙柯媚綠漪莫謂微芰無妙意也知造物等兒嬉
看看膝下成雙綠為應君家此段奇

賀趙及卿黃定甫主賓聯名登第

人傑須知本地靈
驚峯挺拔湛溪清
新添九桂叢芳茂
叢桂登科至
旁發一枝花更榮
定甫主叢
桂師席
及卿九人
文社只今傳

盛事宦途從此展
修程歸耕媿我猶
無地僅有青山一

笑迎

送趙局之官

琴書結束定何時折贈新年梅一枝詩過釣臺天欲雪
春歸湖岸柳成絲交遊文社頓成濶富貴帝鄉今可期
小試活民醫國手眼明諸老會相知

十二月十二日踏雪度崧嶺

何事隆冬震地雷天公補過令方回

前數夕大雷

玉裝庭樹

三番白花間江梅六出開豈止為民除瘴癘且欣無地

不瓊瑰到家未說豐年事
喜奉慈親酒一杯

其二

雪行崧嶺歲華新
又作殘年踏雪人
茅屋畫簷俱富貴
穉松枯木總精神
哦詩未怕寒生粟
舉酒惟知暖欲春
自說到家貧亦好
兩峯門外玉璘珣

十二月廿三日舉故事訪黃岡梅

歲披草棘訪槎牙
為愛凌霜傲雪花
不學春花嬌女面
朱簾翠幙幾重遮

壬申春社前一日晚步欣欣園

何必遊園問主人只尋花柳鬧中春
都無揀擇行隨意不費思量句有神
是處林園明紫翠晚晴樓閣倚嶙峋
村村鷄酒相招喚安得便為同社鄰

和趙忠州歸耕之賦

壯年學易計非疎晚讀人間種樹書
不向雲霄羨鴻鵠却來江海伴春鉏
感君綠野成歸計令我青山思故居
只恐奇謀未施設折秦強趙要相如

三月八日晚步溪上二絕

綠楊芳草兩邊洲，不礙晴川日夜流。
我到忘機每終日，為誰飛去怪沙鷗。

其二

畫筆難描蘋渚意，詩情難狀柳堤風。
若令妙處人皆會，甘把漁竿伴釣翁。

天王寺佛塔燈隔林見之奇絕因成口占

上元燈火九衢中，何似金蓮下半空。
要識隔林奇絕處，

星毬帶葉荔枝紅

荔枝有星毬紅

賦葉茂卿泉石軒

郭外多佳士溪南好結廬

借韻

因君愛泉石令我想風雩

既有琴書樂應無世俗拘誰能厭朝市來此共須臾

行崧嶺將半下瞰山中一人家似不與世接者凝

佇久之因成一絕

幾曲青山一畝宮前村惟有小溪通鷄鳴鳥宿知昏旦

水碓無人自在春

寄題張正國斗齋

幾人大厦室廬窘之子數椽天地寬
醉裏揮毫詩膽大不懸金印老江干

其二

蒲團竹几炷熏爐
讀平生未見書
酌古量今會文夜
清風明月四窓虛

其三

數年約我過溫溪
好趁雞黃秋黍炊
添子江湖千頃意

勸於窓外作盆池

送會稽王君東歸

人生相遇若雲萍，聽唱陽關酒暫停。
夜雨挑燈今昨恨，秋風吹夢短長亭。
笑予衰鬢霜侵綠，喜子新功刃發硎。
欲當馬過何以贈，江邊猶有柳條青。

視新買徐七塢田

人說山田薄有收，不如平壤水交流。
深耕早種將勤補，亦勝當初無寸疇。

和周次公韻送鄭恭叔歸城南并簡次公

三十年前識雅容，蹉跎人事各成翁。而今頭白燈明裏，

有酒何妨一醉紅。

予與恭叔同庚

其二

春山曾記別匆匆，多少傳言詩句中。遠目不窮天萬里，

幾隨西日送征鴻。

春山次公自號

癸酉立春衝雪觀梅

吾翁當日手親栽，今見芳英幾度開。把酒未能娛一醉，

衝寒犯雪日須來

老人及兒輩皆和再用前韻

不廁繁桃俗杏栽詩懷端為此花開
自緣祗結冰霜侶
花底渾無俗駕來

題趙守飛霞亭

問津早似武陵溪屋上鷺峯有遯肥
醉臉丹時歌雪白
碧山深處染桃緋林亭縹緲仙翁樂
酒盞交酬花片飛
消遣箇中閒日月賦詩應不送春歸

再用韻呈趙守

不待漁舠喚隔溪種桃千樹正紅肥
山圍曉障新圖畫
花押春班簇紫緋池淨白鷗相對浴
客來青鳥故雙飛
寄詩為問花前醉何似天香滿袖歸

和趙忠州園亭落成宴客三首

雙旌未逐詔書還放適何妨且謝安地
拔鷺峯長突兀
天教老子得蹢躅病瘳不必維摩問
客醉誰知太守懽
更乞為時推此意要令宵旰九重寬

右自為堂

水香流出洞中花
曾閱秦朝與漢家
咫尺不知塵世隔
漁郎回首鎖烟霞

右飛霞亭

自來名教屬吾曹
立極何須說斷鰲
聊把經綸寄魚釣

豈無裴楷試仙濤

趙侯時以諸司薦

右釣鰲

廬陵趙令君宅後有蓮濠
月夕相拉觀蓮戲廬陵

朱橋綠水夜深遊，滿載荷花萬斛舟。
多病近來常止酒，及無尊俎欠風流。

廬陵呼酒再用韻

令君領客作清遊，蕭散仙人蓮葉舟。
喚得酒來詩興發，浩歌和月吸黃流。

廬陵於兩池中作舡亭，名卧蘆，取山谷滿舡明月。
卧蘆花之句落成為賦小詩。

路入芳池柳岸行，宛然野渡一舟橫。
祗緣曾次規模別，

便有江湖氣象生雲影恍疑帆影度嘯歌中有棹歌聲
天書恐逐銜蘆鴈未許花邊卧月明

晚坐卧廬復與廬陵同用前韻

待得巡簷有月行梅仙無惜為琴橫

廬陵子思安尉善琴

頻招野

客耽詩興祇恐東君費麴生挂笏靜看山擁翠凭欄閒
聽水流聲人生聚散無勞較萬里青天白鳥鳴

八月十日過松水

拂石臨流幾歲秋未嘗歷險究源頭今朝拄上雲烟去

為吸清冷最上流

以壽山石條環寄趙昌甫將以廿八字

連城價重雖非玉千古名存壽此山野服閒居頗相稱
無端因得玩如環

甲戌正月從君用弟覓月桂栽

花發枝頭月月新不妨分種過西鄰琴書結束歸來日
要使門庭長有春

克齋集卷十六

欽定四庫全書

克齋集卷十七

宋 陳文蔚 撰

送葉味道赴南宮

聖世宗儒重設科名公碩德總搜羅
近年底事摧頽甚
士氣都緣斲喪多憂世情詞常懇惻
喜君事業久研磨
不才但有山林興洗耳專聽奏凱歌

呈倉使覓官書

歲月蹉跎髮已絲埋頭自笑有書癡
故人儻解憐清好

歸去山房補缺遺

池陽地寒梅開甚晚上元後始見疎花一夕春雪

曉起觀梅為梅解嘲

千林一夜散瓊瑰莫謂亭前春後梅未入紛紛紅紫隊
不妨曾是雪中開

倉使亦為梅着句適與予意相合和其韻

六花如覺厭春遲桃未敷紅柳未垂只有紅梅太孤寂
裁冰綴玉助清奇

別倉使二首

千里江頭訪故人事雖論舊道彌新懸知一味憂勤意
要活九州窮困民秋月洞明波底影祥風潛有雪中春
荒山僻嶠雲深處無惜過驅六轡均

其二

服膺師訓毅名齋觀省無妨動與偕只向此中窺所守
已知平日謹諸懷器充宏博乾坤大理析精微律呂諧
吾道古今窮不盡一尊深夜講朋儕

歸途喜晴

來時風雪亂紛紛
歸日川原處處春
因識發生真意思
雨餘花柳更精神

追賦齊山

興動齊山杖屨飛
可人遲日嫩晴暉
一堤烟柳連秋浦
萬里江山入翠微
泉石怪奇難盡究
古今題品待攜歸
春來歌酒雖無禁
不與紅塵染是非

追賦臺治諸景有懷倉使

日日花光展翠遊芙蓉高樹壓城頭招邀風月新添竹
管領湖山數上樓欲伴清琴庭舞鶴不驚使節浦眠鷗

花開紅藕薰風細恨不同撐柳外舟

花光展翠亭名
城隅有九芙蓉正

面九華湖山
樓面秋浦

追賦西廟廣覺寺

精藍同占一青山遊子紛紛春自閒要福乞靈從爾輩
獨攜筇杖款松間

晨興

書窓欲曙夢初還起坐披衣百慮閒誰識斯時會心處
靜聽鳥語樂相關

送趙國呈赴金壇

乃兄忠州舊為金壇簿

未成花柳種成堤早有先聲到浙西待得已書馴雉績
不妨聊訪舊鸞棲堂前風入琴三弄江上春歸雨一犁
莫道催科能樣急也分一念到羣黎

與周希顏遊靈泉歸途偶作

花日遲遲暖似烘杖藜飛舞趁東風野橋傍水柳先綠

山寺留春挑正紅信步哦詩忘日晚因言契理覺春融
莆田遠在千山外長使靈泉信息通

希顏將有
蒲中之遊

和昌甫見寄韻

每日相親一卷書席門猶是昔年如似公長者今時少

花外何時見小車

昌甫屢
未見訪

清明上冢見杜鵑花

春來未聽杜鵑啼但見青山花滿枝俗禮不違聊上冢
他鄉寒食嘆年時

希顏見寄二絕和韻

海棠帶雨淺深紅
共憇閒亭拂面風
識得春光隨處樂
鬢絲誰管已成翁

其二

乳燕將雛看學飛
絕勝對客塵頻揮
綠陰翠幄閒中好
誰道春隨紅紫歸

周公美載酒見過以長句見謝意

門前題鳳風何薄
雪夜回舟意未真
誰似松溪弄明月

興來載酒訪幽人扣舷牛渚盟當踐落帽龍山約又新

況有梅花涼玉雪暑窓容我日為隣

頃歲公美約造小舟泛溪往來竟未

酬此願是夕又約重陽游靈泉為登高之會公美家梅花秋來爛開蒙折贈數枝故詩中及之

中秋後一夕正望浮橋觀月

省賦山間明月章好風吹我上河梁冰輪不帶一分缺
玉鑑無如今夕光正自凭欄觀水靜不妨倚杖看人忙
有誰會得遲歸意籟息天高午夜涼

重九後一日同公美遊靈泉公美舉示蓮塘納涼

之句後公美和予浮橋觀月之韻紀靈泉之遊
予以老人不快不暇即賦老人既安用渠納涼
韻為謝

寺訪靈泉山路長賦詩因得話蓮塘林間度竹風無暑
澗裏流花水帶香靜勝攜筇終日款閑來坐石滿襟涼
紀遊未暇牽人事題品輸君第一章

昌甫寄徐崇甫書并崇甫寄渠詩及渠兄弟和章
因次其韻呈昌甫

念作章泉去川流日夜東
一身長是客雙鬢已成翁
霖想瀟溪月和思柳下風
平安毅齋信多謝為流通

十月九日同公美踐上林之約回途紀實

景入小春方嫩寒緩行不覺
鳥間關倚空疊嶂何嶮翠
帶石清溪屢遶環政擬徘徊
檀木嶺且先點檢上林山
杖藜未作忙歸計又喜臨清得釣灣

壬午三月廿三日偕諸生攜酒過公美家公美宅

前山花爛開極可愛為賦一絕

青春深處每徘徊為愛花城錦繡堆誰似君家奇絕處
坐迎春色入門來

公美約同遊龍安寺僧畱小飲歸途一絕

幾年無便到招提沙路徐行趁碧溪花竹禪房成小款
笑談不覺到斜西

十一日同諸友登南臺二絕

萬里秋風約我曹俯觀闌闌總塵勞躋攀不藉登山屐
身世從知本自高

其二

脚底雲山疊疊低
面前一帶繞清溪
秋光總可供吟筆
寫作登高第一題

登山却立俯視一村風物殊可人意二絕

桑柘陰中日日行
只聞犬吠與鷄鳴
此時身在煙雲上
眼界不知如許明

其二

竹樹誰家跨小橋
清溪一帶抱山腰
不須更倩王摩詰

水墨平鋪百尺綃

重陽侍老人飲

九十慈親鬢髮皤今年菊早去年花一尊細說重陽事
似此清懽有幾家

節後赴傳巖叟之招望日同遊栖隱菴華嚴寺呈
巖叟及同游者

乘興聯翩渡小溪輕車不怕日斜西擬來古寺觀新扁
且向山齋讀舊題茆屋起烟歸路暝秋雲閣雨暮天低

人生適意惟行樂不較毫芒寵辱齊

華嚴寺有巖叟新篆山齋舊題乃文

蔚和巖叟詞尚留
群間屈指十年矣

巖叟用前韻相留踐雲巖之約和韻以謝

屢陪軒騎過橫溪

橫溪往雲巖路

每想雲巖望眼西酬約再尋

山下路賦詩畱與石間題吟風弄月計為上競利爭名
著總低明日杖藜歸故隱人生離合信難齊

贈說相道人

我生本是山澤癯只愛竹林癡讀書道人相遇說心相

我亦無心更問渠

齋前梅開

每歲衝寒出探梅
如今花向屋簷開
玉顏相見無朝晚
遶樹須拚日百回

癸未二月廿五日訪周道人西菴戲題

道人邀我飯胡麻
半日清閒得遠家
多少欲來無路問
空於洞口覓桃花

清明前二日同周公美黃子京郊行和子京韻

武夷雲會總儒衣今似晨星漸覺稀晚節喜君同臭味
不嫌枯淡肯來歸

其二

尋春杖屨偶乘閒多謝詩囊肯破慳坐石有言盟白石
愛山隨意買青山

其三

大道公行居廣居取將仁義作蘧廬直須至理超然會

不在陳編細字書

子京多愛抄錄
未章故及之

後一日因展省歸途口占

千丈樞衣記武夷家山今日屢攀躋春風拍拍滿懷處

況是花開更鳥啼

先生答陳同父書謂武夷春月花開鳥啼亦自不惡

其二

春光休道屬誰家造化平鋪無等差不問世間凡草木
得春隨意總皆花

寄題黃子京貧樂齋

羞逐紛紛世所趨東溪風月未嘗孤閉門蒿簞從渠長

堆案簡編聊自娛機括要須明活法簞瓢非但守枯株
不觀點也風雩意灑落胸中一累無

又謝子京惠贄見

少日深期造孔門于今老矣嘆無聞自憐大業乖傳授
賴有遺編可討論君贈名章多過譽我慚衰朽不勝文
誓言願畢餘生力細與窮源探本根

進退
韻

集著尚書偶成

水飲已忘三月味囊空真乏一錢儲屢空本是吾家事

羸得閒身且著書

灌圃

少日嘗嗤稼圃非近來閒聽老農知
世間機械從來耻
不憚晨昏抱甕疲

賦決明

每薦盤飧自覺清
嘗於雨後擷其英
未言服餌收奇效
翠葉黃花眼早明

永豐祝子益和予詩見寄許見訪以長句謝之且

堅其約

反關甘與世情睽綠遍閒庭草欲齊何處客來談列岫
有人雪踏自東溪坐低流俗幾千輩已見新詩第一題
他日竹林如肯過聖門相與探端倪

列岫子益燕坐之
齋東漢子京所居

也

寄題列岫

面面青山不記名想知宜雨亦宜晴去來自在雲千疊
高下無多屋數楹晨誦書絃俱樂事春光秋月總詩情

箇中真樂誰能識不問人間枯與榮

葉茂卿寄詩卷賦此以謝之

正念交情舊忽來詩卷新既能賒酒飲寧作賣書貧計

想尋窓下閒須過澗濱為言田舍樂花鳥亦情真

賒酒賣書

用渠詩
卷中話

送趙國宜之官武林

自從栖隱入山深間濶真同金玉音已謂清光依日月
不知幽趣尚園林暫違陶徑菊松面喜動蘇堤梅柳心

聞道專留薦賢牘知音當在伯牙琴

送趙惠卿赴玉沙法曹

不辭艱險涉江湖素志惟期欲展舒
平允外應無別法坦夷中自有亨衢
雖云天遠雁行近未至風高魚素踈
見說民淳須事簡不妨宦學進工夫

昌甫前詩見簡方和去未達間再於巖叟處見後
詩和韻以謝

章泉相去每相思多謝交情不見遺
繾綣方賡前日句

聯翩又讀後來詩梅方迎臘多投好菊已凌霜不入時

大抵世情皆若此吾儕真結歲寒知

趙詩首及梅菊

一夕夢中得絕句覺時惟記後二句寢真因潤色

足成之

歲月苦為身口累風霜無奈鬢毛侵

夢中彷彿如此

中間一事

却奇特存得當時一片心

甲申正月答昌甫見寄韻代書

負米嘗漂迹關心為倚門盡歡惟啜菽奉旨屢空尊溫

勸勞分給新詩且記存開緘細吟諷小立近黃昏

昌甫寄鍾

乳間勞老人之意甚厚

周公美嘗年有紅梅之約今花時雨雪公美以詩遣花酒和韻以謝

紅梅高賞趣春晴不記年華幾甲庚花酒一時雙遣至却愁不似對梅清

清明資福僧遣詩賦此以答之

清明恰值雨晴時賸喜隣僧福有詩十里懶尋沽酒旆

一編深下讀書帷
放懷是處青春好
無事於中白日遲
況是精藍去家近
興來何惜瘦藤支

和公美一絕

欺人一任雪堆頭
豈復長懷身外愁
涉世自知今已慣
風波應不覆虛舟

四月二日往檀林登車遇雨度鵞湖嶺漸覺開霽
一路晴快野花滿山賦二絕

出門正爾值淋漓
決策登車不自疑
一路新晴天借與

花香鳥語却撩詩

其二

塊坐蕭齋廢短筇一春長在雨聲中
野花留得春光在無數青山玉雪叢

問塵清坐久之歸途偶得絕句

問塵清坐興悠哉小立朱橋未忍回
好景吟情忽相契小溪流出柳陰來

崧嶺石泉

高城石井下成池對自初分混沌時雖小古今無涸溢
却憐江海有盈虧

家園偶聞野花香

杖藜曾是為春忙紫陌青山到處芳不謂竹林栖隱地
好風時遞野花香

六月十二日喜雨

麟經書雨意何如可喜非常故可書膏澤未觀南畝遍
嫩涼且覺北窓虛採詩好入豐年頌把酒聊娛化日舒

懷抱一時寬畎畝微病勿藥頓消除

時臆肺
作楚

賤生諸友有祝頌語以五十六字謝之

庸庸不作世間奇空負生成造化機歲月漫驚多髮積
功程殊未進毫微不貧腰下懸金印且自尊前戲綵衣
多謝諸君借輝潤一朝盈篋盡珠璣

縱步過資福寺僧留飲出示淨度文三教一理論

戲書時寺門桂花爛開

一編淨度出玄文因憇書窓醉酒尊儒釋未須談一二

且於花下立黃昏

九月十八日自雙溪還寺車中偶得

太初元有此山川往古來今幾許年
合是地靈神降嶽為生人傑柱驚天
遺民但抱羲農朴正學誰知孔孟傳
要識碧溪流不斷後人須看石崖鐫

隱將峽口占二絕

小似武夷深更幽地盤九曲一溪流
誅笄結屋雖成左
羸得青山自在遊

其二

四顧青山數畝餘，豈無閑地可耕鋤？
有人肯辦入山苦，滿谷桑麻繞舍蔬。

謝昌甫以詩惠藥牋

藥裏屢蒙扶病親，一番書至一情真。
人言莫急晨昏奉，我嘆尚為萍梗身。
栖隱重曾定要約，章泉一見話悲辛。
吳牋況拜慇懃賜，且續新詩為縷陳。

和張元德寄昌甫末章見及之韻

江南目斷短長亭會面無繇見德星所及交情無皂白
且欣師訓炳丹青君將偃室春鳴瑟我但萊衣日過庭
多謝新詩相勉進敢忘圭復識中局

用前韻寄昌甫

幾欲來觀魚計亭

昌甫家亭名

未酬此約已星星自從蕭寺

一回別不記春山幾度青尚友古人長閉戶喜聞新命
忽揚庭興來會作扁舟去剝啄應勞為啟局

和周公美韻

風光報答可無詩
漸喜春風熟燕泥
客至甚思留竹隱
書來無奈趣巖栖
謂巖叟也
幸同故國雲雖暮
朗誦新吟日未西
自愧續貂才不敏
徘徊月已在櫟題

趙忠州雨中賞海棠

問春何事苦晴慳
春意惜花留嫩寒
共到花前細商畧
精神最好雨中看

賦蕭爽簷蔔戲巖叟

且喜花時雨不妨
凭闌閒與細平章
一池交映月添白

六出同妍雪遜香素有書癡緣病懶不知詩興為渠忙
道人雅好惟清供却恐花神索酒觴

月夜觀花

底事更深睡不成惜花愛月兩關情黑甜一枕雖云美
未省人間有此清

巖叟約觀栖隱簷蔔雨阻和前韻送酒再用韻答
之

暫輟書程業未妨倚欄高誦杜陵章不知雨意將詩意

但覺花香帶酒香散破苦嫌饑雀下爭喧閒看蜜蜂忙
也知栖隱如蕭爽恨不花前共舉觴

六月十七夜待月

凝佇虛亭未愜心清光隱隱隔疎林欲觀玉鑑呈全體
獨倚朱欄到夜深

黃子京見訪值予未還留詩和韻以謝

自從別去竹林居暇日尋詩每念渠疾讀新編慰牢落
清風習習滿襟裾

其二

此去團溪百里餘不須蹤跡嘆差殊
平鋪此理元無間
曾驗工程進也無

子京又以長篇告別值予欲出一絕謝之

二年不作上方游一日重尋舊話頭
却恨嬋娟成兩處
清尊無分共中秋

克齋集卷十七